

Statut Mostara predstavlja osnovu za normalizaciju

Građani Mostara su predugo čekali da se stavi tačka na podjele i paralelne institucije. Vodeće međunarodne institucije predstavljene u BiH - OSCE, OHR, EUPM, Svjetska banka, Evropska komisija, UNHCR, UN i MMF - u potpunosti podržavaju novodonešeni Statut grada Mostara, i smatraju da je on dobra osnova za ponovno ujedinjenje grada, kojom će se spriječiti dominacija bilo kog naroda nad drugima a istovremeno svim građanima pružiti veći izgledi za prosperitetnu budućnost. Kada Mostar bude uspio prevazići reputaciju razjedinjenog grada, sve više stranih i domaćih ulaganja počće pristizati u taj grad, a on će povratiti svoj status glavnog turističkog odredišta u BiH.

Ponovno ujedinjenje grada će značiti da će administracija ovog grada biti u prilici bolje služiti njegovim građanima, te da će im pružati adekvatno obrazovanje, zdravstvenu zaštitu i druge usluge. Šest općina koje su do sada postojale koštale su svakog muškarca, ženu i dijete po 310 KM.

Mostar je već isuviše dugo simbol podjela i nefukcionalnosti u Bosni i Hercegovini. Odluka visokog predstavnika da donese novi statut grada predstavlja krajnji ishod desetomjesečnog rada domaćih organa, uz pomoć predstavnika međunarodne zajednice, na izradi novog organizacionog plana grada - plana koji će ponovo ujediniti njegove građane i sa zakašnjenjem staviti tačku na ratne podjele.

Pokazujući novi duh kompromisa, druga Komisija za reformu grada Mostara uspjela je postići dogovor o većini pitanja koja se tiču upravljanja gradom. Međutim, visokom predstavniku je ostavljen zadatak da premosti preostale razlike, i na taj način obezbijedi ono što bi trebalo biti trajno rješenje, u istom duhu kompromisa. Šefovi vodećih međunarodnih institucija u BiH se nadaju da će svi građani Mostara podržati ishod zajedničkih napora.